

## **CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE E A FEDERACIÓN ESPAÑOLA DE RELIXIOSOS DE ENSINO-CENTROS CATÓLICOS (FEREGA-CECA) PARA REALIZAR ACTUACIÓNS EN MATERIA DE NORMALIZACIÓN LINGÜÍSTICA**

En Santiago de Compostela,

### **REUNIDOS**

**Don José López Campos**, conselleiro de Cultura, Lingua e Xuventude, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro, e pola Lei 12/2007, do 27 de xullo, de acordo co seu nomeamento polo Decreto 44/2024, do 14 de abril, publicado no DOG núm. 73, do 14 de abril, e polo disposto no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, publicado no DOG núm. 81, do 24 de abril.

**Dona Juana Otero Torres**, secretaria autonómica da Federación Española de Religiosos de Enseñanza de Galicia-Centros Católicos, que actúa en nome e representación da Federación Española de Religiosos de Enseñanza-Centros Católicos, co CIF R-2800244B, en virtude do poder outorgado perante o notario de Madrid, don Juan Aznar de La Haza, o día 9 de outubro de 2018, e co número de protocolo 3545.

### **EXPOÑEN**

1. Que ambas as entidades consideran como referente normativo básico da súa actuación a Lei 3/1983, do 15 de xuño, de normalización lingüística, onde se recoñece que o galego é a lingua propia de Galicia e que os poderes públicos garantirán o seu uso normal como lingua oficial da Comunidade Autónoma galega, así como o Plan xeral de normalización da lingua galega, que aprobou por unanimidade o Pleno da Cámara do Parlamento de Galicia na súa sesión do día 21 de setembro de 2004, coa finalidade de estender o uso do galego a todos os eidos da sociedade e tamén de favorecer a súa dinamización no tecido económico para

estender o seu uso nas relacións laborais, comerciais e empresariais, co fin de incrementar produtos e servizos en galego en todos os ámbitos sociais e económicos.

2. Que, no ámbito da Administración autonómica galega, lle corresponden á Consellería de Cultura, Lingua e Xuventude, a través da Secretaría Xeral da Lingua, as competencias de promoción e ensino da lingua galega, así como a dirección, planificación, coordinación e execución da política lingüística da Xunta de Galicia.

Para este efecto e para poder actuar en todos os ámbitos sociais, ten que colaborar, na medida do posible, coas institucións e entidades que desenvolven a súa actividade en Galicia.

3. Que a Federación Española de Religiosos de Enseñanza-Centros Católicos é un organismo de dereito pontificio con personalidade xurídica propia. Está integrada polos superiores maiores dos institutos relixiosos e das sociedades de Vida Apostólica e por representantes doutras entidades. Dedícase ao ensino e á educación católica en calquera das súas formas e conta cun total de 2000 centros no eido nacional. En Galicia, está representada pola Federación Española de Relixiosos do Ensino de Galicia-Centros Católicos (en diante, Ferega-Ceca), da que forman parte a práctica totalidade dos centros de ensino católicos da Comunidade Autónoma galega.

4. Que entre os fins e obxectivos desta entidade hai que destacar os seguintes: proporcionarlles aos seus membros, ao profesorado e a outro persoal dos centros integrados os medios necesarios para o seu perfeccionamento técnico e pedagóxico; potenciar a calidade da ensinanza nos centros docentes e a participación da comunidade educativa; favorecer o estudo en común dos problemas pastorais no ámbito da educación, e informar, asistir e asesorar os centros de ensino e os institutos pertencentes á devandita entidade.

5. Que Ferega-Ceca, consciente da importancia do cumprimento do establecido sobre normalización lingüística e da responsabilidade que nesta materia teñen todas as institucións galegas, elaborou un novo Plan de dinamización lingüística referido aos centros nela integrados que, logo de aprobarse en Asemblea Xeral, se puxo en marcha no ano 2012 e ao que se lle dará continuidade no exercicio 2024.

6. Que esta federación é a única entidade que aglutina en Galicia a maioría dos centros católicos que se dedican á educación. Na actualidade, ten uns 115 centros asociados e nas súas aulas estudan máis de 60.000 alumnos e alumnas. Ademais, ten en marcha un proxecto innovador e propio en materia lingüística no eido educativo, polo que non resulta posible promover a concorrència pública para levar a cabo as actividades previstas no convenio.

7. Que ambas as entidades consideran esencial implantar o novo plan de dinamización nos centros educativos asociados a Ferega-Ceca e manifestan a súa vontade de continuar colaborando no seu desenvolvemento para conseguir o obxectivo común de que o galego sexa a lingua operativa en todos os ámbitos da sociedade e, especialmente, no do ensino.

Por este motivo, ambas as dúas entidades asinan este convenio de colaboración de acordo coas seguintes

## **ESTIPULACIÓNS**

### **Primeira. Obxecto**

Este convenio ten por obxecto establecer as bases polas que se rexerá a colaboración entre a Consellería de Cultura, Lingua e Xuventude, a través da Secretaría Xeral da Lingua, e Ferega-Ceca, para prestixiar e promover a estima do galego como feito diferencial da nosa terra e, ao mesmo tempo, para potenciar o seu uso entre o persoal dos centros, o persoal docente e o alumnado.

As partes colaborarán na realización dun programa de actuacións para continuar coa implantación do Plan de dinamización lingüística que aprobou esta entidade en Asemblea Xeral no ano 2012 nos seus centros asociados.

A implantación do citado plan ten por finalidade promover o uso do galego no ámbito administrativo e docente, na actividade pastoral, nas relacións interpersoais en todos os centros dependentes de Ferega-Ceca e no funcionamento desta entidade no eido autonómico.

### **Segunda. Obrigas de Ferega-Ceca**

Como compromisos ás obrigas derivadas da Lei 3/1983, do 15 de xuño, de normalización lingüística, e mais do Plan xeral de normalización da lingua galega, mediante a sinatura deste convenio, Ferega-Ceca comprométese a continuar co desenvolvemento do Plan de dinamización lingüística que esta entidade aprobou no ano 2012, para o que realizará durante o ano 2024 as seguintes accións que se desenvolverán en lingua galega:

### **ADMINISTRACIÓN**

#### **A) Distribución, vía correo electrónico, de modelos de documentos para a Administración**

Elaborar e distribuír entre os centros, mediante correo electrónico, modelos de documentos habituais nas súas administracións (circulares internas, circulares para os pais, boletíns de notas...).

#### **B) Servizo de información ao persoal directivo dos centros**

Distribuíráselles ás direccións dos diferentes centros, mediante correo electrónico, información referida á normalización lingüística, con especial fincapé nas obrigas dos centros en relación coa lingua (marco legal, situación dentro do PE...).

Este servizo de información ponse tamén á disposición dos centros para a solución de todas as dúbidas que se lles poidan presentar.

### **PASTORAL E EDUCACIÓN RELIXIOSA**

#### **A) Distribución do servizo litúrxico Remol**

Continuar distribuíndo a todos os centros o servizo litúrxico Remol. Convén salientar a importancia que ten, dado que é o único servizo de comentarios sobre as lecturas da misa que existe en galego.

### **B) Distribución de material de pastoral en galego**

Seguir coa distribución aos equipos de pastoral dos centros de material en galego que lles poida resultar de utilidade na súa práctica diaria, como poden ser: oracións e presentacións para traballar as diferentes festas do ano, obras de teatro ou partituras de panxoliñas para o Nadal, lecturas para as celebracións litúrxicas e outro material didáctico que demanden os centros.

Tamén se lles enviarán aos centros presentacións relacionadas coa pastoral. En canto ás presentacións xa existentes, traduciranse ao galego e, por outra banda, realizaranse outras novas. Buscarase que cada unha delas se poida utilizar en diferentes unidades didácticas.

### **C) Celebración de diferentes festividades presenciais ou virtuais: Día das Misións-Domund, Día Mundial da Paz, Festival de Panxoliñas, Xornadas de Pastoral...**

En diferentes cidades, organizaranse as festividades sinaladas con diferentes actividades para o alumnado e con cancións e oracións en lingua galega.

### **D) Servizo de información ás persoas responsables da pastoral dos diferentes centros**

Facilitaráselles aos centros información de todos os temas relacionados coa pastoral en galego. Enviarase, mediante correo electrónico, información das novidades editoriais en galego que vaian aparecendo. Informarase igualmente dos acordos aos que chegue Ferega-Ceca coas distintas editoriais relixiosas.

Así mesmo, realizaranse varias visitas aos centros das diferentes cidades máis representativas para dinamizar a pastoral en galego.

## **DOCENCIA**

### **A) Cursos de formación para o profesorado**

Cada ano, a Comisión de Normalización Lingüística de Ferega-Ceca ofértalle ao profesorado dos seus centros cursos que responden aos seus intereses e que se van impartir integramente en galego nas diferentes zonas. Serán cursos, seminarios ou xornadas que tratarán temas como as novas tecnoloxías, recursos e actualización

do galego e outros que demanden os profesores e profesoras dos colexios adheridos á federación.

Tamén se lles ofrece información a todos os centros sobre a convocatoria dos Celga para que o profesorado dos centros e mais os pais e as nais do alumnado que estean interesados os poidan realizar.

### **B) Servizo de información aos responsables de dinamización lingüística dos centros**

Seguiranse mantendo reunións de traballo coas persoas responsables dos equipos de dinamización lingüística de zona e, ademais, distribuirase a todas as persoas responsables dos equipos de dinamización lingüística dos centros, mediante correo electrónico, información referida á dinamización lingüística, con especial fincapé en varios aspectos, entre os que destacamos os seguintes:

1. Dar a coñecer as obrigas dos centros coa lingua (marco legal, situación dentro do PC...).
2. Distribuír información sobre as axudas institucionais e sobre as campañas de sensibilización que estas organizan.
3. Facilitar materiais didácticos.
4. Informar das novidades editoriais.

Ademais, este servizo ponse á disposición de toda a comunidade educativa e, en concreto, das persoas responsables dos equipos de dinamización lingüística dos centros para solucionar todas aquelas dúbidas que se lles poidan presentar.

### **C) Xornada de Normalización Lingüística de Ferega-Ceca**

Tras celebrar a XIX Xornada de Normalización Lingüística de Ferega-Ceca no mes de novembro de 2023, organizaremos a vixésima edición no mes de novembro de 2024. Esta xornada está dirixida ao persoal director e coordinador dos equipos de dinamización lingüística e a todo o profesorado dos centros, tanto públicos coma privados, con relatorios que versarán sobre temas actuais relacionados coa normalización e a dinamización lingüística.

### **D) Convocatoria dos Premios Irmán Reboiras ás mellores iniciativas de fomento do galego**

Estes recoñecementos entregaranse no transcurso da Xornada de Normalización Lingüística.

### **E) Convocatoria dos premios ás mellores experiencias en innovación pedagóxica e en pastoral**

Todos os recoñecementos utilizan o galego como lingua vehicular.

### **F) Espazo web con ligazóns e material didáctico**

Na páxina web das Escolas Católicas, hai un espazo dedicado á normalización lingüística no que se van incorporando ligazóns de interese relacionadas coa lingua e coa cultura galega e, ao longo do curso, iranse colgando unidades didácticas e recursos en galego que lle poidan servir ao persoal docente nas súas tarefas cotiás.

## **ALUMNADO**

### **A) Premio Frei Martín Sarmiento**

Trátase dun concurso dividido en seis categorías, ademais da de infantil, dirixido ao alumnado dos nosos centros e aos pais e nais. Unha comisión de profesores e profesoras de diferentes centros escollerán dous títulos finalistas en cada unha das seis categorías e será o alumnado e mais os pais e as nais os que seleccionen a obra premiada.

No mes de xuño, remítense aos colexios os títulos finalistas co obxectivo de que estes se involucren e se animen a incluílos no seu plan de lectura. No mes de abril, tras realizar as lecturas dos dous finalistas, o alumnado emite as súas valoracións.

A primeiros de maio de 2024, organizaremos a entrega da vixésima edición dos Premios Frei Martín Sarmiento e, no mes de setembro, lanzaremos a convocatoria da vixésima primeira edición.

### **B) Festas da Lingua, Día das Letras Galegas, Día de Rosalía**

Nas Festas da Lingua, unha actividade de animación á lectura, participan os alumnos e alumnas de primaria e secundaria —moitos deles tomaron parte na lectura dos libros do Premio Frei Martín Sarmiento—, aínda que poden participar todos aqueles que o desexen.

Durante o mes de abril ou maio, realizaranse nalgunha cidade de Galicia encontros do alumnado e do profesorado cos autores e autoras das obras finalistas en cada unha das categorías e entregaráselle o premio á autora ou

autor gañador de cada unha das categorías. Ademais, ofrécense distintas actuacións e actividades onde se fomenta o uso do galego.

-Celebración do Día das Letras Galegas en Santiago. Iníciase o festexo no Panteón de Galegos Ilustres, onde se homenaxeian distintos autores e autoras das nosas letras. Posteriormente, os centros realizan unha ruta pola cidade de Santiago.

-O Servizo de Dinamización de Escolas Católicas está a impulsar a celebración do Día de Rosalía. Ademais de sumarse ao Caldo de Gloria organizado pola Fundación Rosalía de Castro, tamén organiza de forma conxunta distintas actividades co alumnado. Rutas literarias, ofrendas florais, lecturas de poemas, música... son algunhas das actividades que se realizan para homenaxear a escritora.

### **C) Edición do concurso de curtametraxes Rec-Curta e acto de entrega dos premios**

Realizarase a décimo quinta edición do Rec-Curta, un concurso de curtametraxes en galego con temática de ficción, dirixido ao alumnado da ESO, bacharelato e formación profesional, e no que se valorará a orixinalidade e a corrección lingüística. En maio, organizarase a entrega dos premios nos que se poderán ver as mellores películas de cada categoría.

Ademais, o alumnado participante no certame, entre eles os galardoados e galardoadas cos premios á mellor película e ao mellor uso da lingua, asistirán ao Festival de Cans, no que gozarán dunha visita guiada e onde se proxectarán as películas gañadoras do certame nas dúas categorías.

## **AS FAMILIAS E AS ANPAS**

### **Acto de entrega do premio da sexta categoría para pais e nais nos premios Frei Martín Sarmiento**

No Premio Frei Martín Sarmiento, hai unha convocatoria de lectura dirixida ao profesorado e aos pais e nais do alumnado dos nosos centros. Invitaranse os adultos que participaron na lectura nun encontro no que se lle dará o premio ao autor ou autora gañadora.

### **Terceira. Modificación do convenio/redistribución de cantidades entre diferentes actividades**

Se posteriormente á sinatura do convenio, e por circunstancias debidamente xustificadas, a entidade quere modificar ou cambiar algunha das accións recollidas no obxecto do convenio, esta modificación ou cambio instrumentarase mediante a correspondente addenda, agás naqueles casos nos que a modificación implique só unha redistribución das cantidades previstas estimativamente para cada unha delas segundo a desagregación prevista na memoria xustificativa e económica do convenio que figura no expediente de gasto, sen que se produza unha modificación orzamentaria respecto do importe total do convenio e sen que comporte, de ser o caso, unha redistribución orzamentaria entre diferentes capítulos de gasto.

Os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostibilidade financeira.

Estas modificacións terán por obxecto a redución do volume das obrigas ou a ampliación do seu prazo de execución.

#### **Cuarta. Asesoramento lingüístico**

A Secretaría Xeral da Lingua comprométese a facilitar, cando sexa preciso, o apoio e o asesoramento técnico en relación cos aspectos lingüísticos e terminolóxicos que teñan relación coas actividades deste convenio.

#### **Quinta. Financiamento**

A Consellería de Cultura, Lingua e Xuventude, a través da Secretaría Xeral da Lingua, contribuirá ao financiamento deste convenio cunha cantidade total de **15.000,00 €**, con cargo á aplicación 43.02.151A.481.0 dos orzamentos xerais da Comunidade Autónoma de Galicia para o ano 2024.

#### **Sexta. Xustificación e pagamento**

A documentación requirida na fase xustificativa presentarase telematicamente accedendo ao expediente na carpeta do cidadán da persoa

solicitante/representante (<https://sede.xunta.gal/carpeta-do-cidadan>). O código do procedemento é o seguinte: PR004A.

Ferega-Ceca poderá percibir a achega da Consellería de Cultura, Lingua e Xuventude que se establece na estipulación anterior do seguinte xeito:

Mediante pagamentos parciais, na medida en que a entidade beneficiaria xustifique os gastos a conta da liquidación definitiva, ata o oitenta por cento do financiamento da achega.

O importe do vinte por cento restante aboarase unha vez rematadas as actividades previstas no convenio. En todo caso, o 15 de novembro de 2024 será a data límite para presentar a xustificación.

Para percibir os mencionados pagamentos, Ferega-Ceca queda exonerada de constituír garantía, de conformidade co artigo 65.4 f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Para facer efectivos cada un dos pagamentos parciais, Ferega-Ceca presentará telematicamente a seguinte documentación:

- . Unha certificación do desenvolvemento das actividades do convenio, á que se achegará a xustificación dos gastos que orixine a súa execución, que se realizará mediante facturas. Tamén deberá acreditar e xustificar o pagamento do gasto realizado.
- . No suposto de premios en metálico, Ferega-Ceca deberá presentar un documento acreditativo asinado polo titor ou titora legal do menor conforme recibiu un premio en metálico. Nese documento, especificarase a retención que corresponda polo imposto sobre a renda das persoas físicas (IRPF).
- . No caso de que se publiquen traballos, entregarse nesta secretaría xeral un exemplar para o control das actividades que se prevén no convenio.

- . Unha ficha resumo de execución do convenio (anexo I, que se acompaña co texto deste documento) cuberta pola entidade e na que se indicará, de ser o caso, o número de proxectos, accións ou actividades que se realicen ao abeiro deste, as localidades de execución ou realización, así como a porcentaxe de gasto en proxectos, accións ou actividades dirixidas ás franxas de idade infantís ou xuvenís. Tamén se indicará, se procede, o número aproximado de persoas destinatarias ou beneficiarias das accións, coa súa correspondente desagregación porcentual por sexos.
- . Ademais disto, antes de facer efectivo o 20 % do pagamento final, Ferega-Ceca presentará un informe de resultados das actividades realizadas no marco do convenio e da súa incidencia na promoción da lingua.

No caso de que a xustificación dos gastos sexa inferior ao importe do convenio, a achega da Consellería de Cultura, Lingua e Xuventude diminuírase proporcionalmente.

Esta axuda é compatible coa percepción doutras subvencións, axudas, ingresos ou recursos para a mesma finalidade. Non obstante, o seu importe en ningún caso poderá ser de tal contía que, illadamente ou en concorrencia con outras axudas, ingresos ou recursos, supere o custo da actividade apoiada, de acordo co establecido no artigo 40.1 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Toda alteración das condicións tidas en conta para a concesión desta axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación do convenio.

Antes de asinar este convenio e para cada un dos pagamentos, Ferega-Ceca presentaralle á Consellería de Cultura, Lingua e Xuventude unha declaración responsable asinada polo órgano competente de non ter contraídas débedas, por ningún concepto, coa Administración pública da Comunidade Autónoma galega, así

como de estar ao día coas obrigas tributarias e ao corrente das obrigas sociais, de acordo co artigo 11 Lei 9/2007, do 13 de xuño, de subvencións de Galicia, e co artigo 11 do Decreto 11/2009, do 8 de xaneiro, polo que se aproba o regulamento da citada lei. Esta declaración poderá substituírse por:

- . Un certificado de non ter pendente de pagamento ningunha débeda coa Administración pública da Comunidade Autónoma de Galicia, expedido pola Consellería de Facenda.
- . Un certificado de estar ao día coas obrigas tributarias, expedido pola correspondente delegación ou axencia do Ministerio de Facenda e Administracións Públicas.
- . Un certificado de atoparse ao corrente das obrigas sociais, expedido pola Tesourería da Seguridade Social.

Non obstante, a sinatura deste convenio comportará a autorización ao órgano xestor para que solicite as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

Ademais disto, antes de asinar este convenio e para efectuar o pagamento final, Ferega-Ceca presentará unha declaración complementaria do conxunto das axudas solicitadas, tanto das aprobadas ou concedidas como das pendentes de resolución para o mesmo fin, das distintas administracións públicas ou de calquera dos seus organismos, entes ou sociedades. En caso de non ter ningunha axuda, deberá presentar unha declaración de que só percibe este importe para esta finalidade.

Así mesmo, Ferega-Ceca deberá achegar unha declaración de que a entidade non se atopa incurso en ningunha das prohibicións para obter a condición de beneficiaria recollidas no artigo 10 da Lei 9/2007, do 13 de xuño, de subvencións de Galicia.

No caso de que se produza un incumprimento das obrigas establecidas no artigo 11 da Lei 9/2007, do 13 de xuño, de subvencións de Galicia e, en todo caso, nos supostos recollidos no artigo 33 desta lei, Ferega-Ceca comprométese a reintegrar

as cantidades percibidas, se as houbese, xunto cos xuros de mora, segundo o procedemento establecido no artigo 37 da mesma norma legal e no artigo 77 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Ferega-Ceca procurará utilizar o galego en todas as comunicacións que estableza coa Consellería de Cultura, Lingua e Xuventude.

Ferega-Ceca facilitará toda a información que lle sexa requirida pola Consellería de Cultura, Lingua e Xuventude, así como pola Intervención Xeral da Comunidade Autónoma, polo Consello de Contas e polo Tribunal de Contas, no exercicio das súas funcións de fiscalización e control.

#### **Sétima. Utilización da lingua galega**

Todas as accións e actividades que se realicen ao abeiro deste convenio deberanse levar a cabo de acordo co establecido nas vixentes Normas ortográficas e morfolóxicas do idioma galego, aprobadas pola Real Academia Galega no ano 2003, tal e como se establece na disposición adicional da Lei 3/1983, do 15 de xuño, de normalización lingüística. Así mesmo, respectarase rigorosamente a toponimia oficial nos termos previstos no artigo 10 da citada lei.

O incumprimento desta estipulación considerarase unha causa específica de resolución deste convenio.

#### **Oitava. Rexistro de convenios. Transparencia e bo goberno**

De conformidade co establecido no artigo 30 da Lei 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, esta axuda será publicada na Base de datos nacional de subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei 15/2014, do 16 de setembro, de racionalización do sector público e outras medidas de reforma administrativa.

Así mesmo, a entidade asinante deberá cumprir coas obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei 15/2014, do 16 de setembro, de racionalización do sector público e outras medidas de reforma administrativa.

A sinatura deste convenio suporá o consentimento expreso da entidade á Administración para que inclúa e faga públicos os datos referidos ao convenio, de conformidade co artigo 15 da Lei 1/2016, do 18 de xaneiro, de transparencia e bo goberno; co artigo 8 da Lei 19/2013, do 9 de decembro, de transparencia, acceso á información pública e bo goberno (BOE 10/12/2013), e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Coa sinatura deste convenio, as partes manifestan o seu consentimento para que os seus datos persoais e mais o resto das especificacións que este conteña poidan ser publicados no Portal da transparencia e Goberno aberto.

De acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, outórgase o consentimento para que se publiquen as axudas concedidas nos rexistros públicos referidos e se indique a entidade beneficiaria, a contía e a súa finalidade.

#### **Novena. Difusión da colaboración das partes**

Nas actuacións informativas e divulgativas e nas publicacións que se fagan relacionadas coas actividades deste convenio, farase constar nun lugar destacado a colaboración das partes e utilizaranse, cando proceda, os anagramas de cada unha das entidades aprobados pola normativa de identidade corporativa.

Sexa cal for o medio de difusión, ambas as partes comprométense a facer mención da outra e deste convenio.

**Décima. Vixencia**

Este convenio estará vixente desde a data da súa sinatura ata o 30 de novembro de 2024. Non obstante, poderá extinguirse polo acordo mutuo e voluntario das partes, pola desistencia dalgunha delas ou pola denuncia deste por mor do incumprimento dos compromisos adquiridos, o que se comunicará de xeito fidedigno, logo da audiencia da outra parte e con polo menos un mes de antelación. O convenio abranguerá as accións obxecto deste que realice a entidade desde o 1 de xaneiro.

**Décimo primeira. Comisión de Seguimento**

Coa finalidade de asegurar o cumprimento deste convenio, crearase unha comisión paritaria de seguimento composta por dous representantes da Secretaría Xeral da Lingua, nomeados polo seu titular, e dous representantes de Ferega-Ceca, que coordinará o seu desenvolvemento. Esta comisión, que estará presidida por un dos representantes da Secretaría Xeral da Lingua, estará facultada para resolver cantas dúbidas poidan xurdir na súa execución, para o que poderá estar asistida polo persoal técnico necesario.

**Décimo segunda. Causas de resolución**

Este convenio resolverase:

- . Polo incumprimento total ou parcial dalgún dos seus puntos.
- . Polo transcurso do tempo estipulado sen que se culminen as actuacións acordadas.

De se resolver o convenio, a Consellería de Cultura, Lingua e Xuventude pode, se é o caso, esixir a devolución da cantidade achegada.

**Décimo terceira. Responsabilidades das actuacións**

A sinatura deste convenio non implica ningún tipo de relación contractual entre as persoas que vaian desenvolver as actividades previstas e mais a Xunta de Galicia, de tal xeito que a esta non se lle pode esixir responsabilidade ningunha —nin directa, nin indirecta, nin subsidiaria— polos actos ou feitos producidos no desenvolvemento do convenio.

#### **Décimo cuarta. Avaliación de resultados**

A Consellería de Cultura, Lingua e Xuventude, a través da Secretaría Xeral da Lingua, avaliará a realización das actividades recollidas na estipulación segunda do convenio e a súa incidencia efectiva na dinamización da lingua.

#### **Décimo quinta. Notificación electrónica**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas e, polo tanto, a recibir notificacións por canles electrónicas son as persoas xurídicas, as entidades sen personalidade xurídica, os colexios profesionais, as persoas que representen unha interesada ou interesado que estea obrigado a relacionarse electronicamente coa Administración e as empregadas e empregados das administracións públicas para os trámites que realicen con elas por razón da súa condición de empregada ou empregado público.

As notificacións realizaranse só por medios electrónicos a través do Sistema de notificación electrónica de Galicia Notific@ (<https://notifica.xunta.gal>). Para poder acceder a unha notificación electrónica, a persoa interesada deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, a persoa interesada pode autorizar a calquera outra a que acceda ao contido das súas notificacións.

#### **Décimo sexta. Desagregación de datos por sexo**

En cumprimento do disposto na Lei 13/2021, de 20 de xullo, pola que se modifica o Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade, para garantir a igualdade real entre mulleres e homes no ámbito universitario e da investigación, toda recollida de datos relativa ao convenio deberá incluír variables que posibiliten o coñecemento da diferente situación e os

resultados reflectiranse por separado en función do sexo. Esta cláusula será aplicable para o caso de que se realicen estatísticas e/ou estudos en desenvolvemento das actividades do convenio.

#### **Décimo sétima. Protección de datos de carácter persoal e dereitos dixitais**

As partes asinantes comprométense a cumprir en todo momento as disposicións contidas na normativa básica estatal e autonómica que xustifica a lexitimidade do tratamento dos datos persoais e dos dereitos dixitais.

Na aplicación deste convenio, respectaranse as esixencias establecidas no Regulamento UE 679/2016 xeral de protección de datos e na Lei orgánica 3/2018, do 5 de decembro, de protección de datos persoais e garantía dos dereitos dixitais (BOE 06/12/2018), e adoptaranse as medidas que resulten necesarias para cumprir as súas previsións e, en particular, para garantir a seguridade e a integridade dos datos persoais e dos dereitos dixitais e a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

#### **Décimo oitava. Administración dixital**

As partes asinantes deste convenio respectarán as esixencias que establece a Lei 4/2019, do 17 de xullo, de administración dixital de Galicia (DOG do 26/07/2019), que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia, pola Administración xeral e polas entidades instrumentais. A devandita lei tamén será aplicable á cidadanía, que ten o deber de utilizar os servizos públicos dixitais que se poñan á súa disposición de xeito adecuado, co respecto das normas de uso, xerais ou específicas, que se establezan para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicos de que sexan lexítimos titulares, usar a información dispoñible conforme á política de privacidade publicada e respectar a normativa en materia de protección de datos de carácter persoal [artigos 2 a) e b) e 7, apartados 1 e 2, respectivamente, da citada lei].

**Décimo novena. Normativa aplicable e xurisdición**

Este convenio ten carácter administrativo, polo que os seus efectos se rexerán polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015, do 1 de outubro, do réxime xurídico do sector público.

O réxime xurídico aplicable a este convenio será o das seguintes normas: Lei 9/2007, do 13 de xuño, de subvencións de Galicia; Decreto 11/2009, do 8 de xaneiro, polo que se aproba o regulamento da citada lei, e Lei de orzamentos xerais da Comunidade Autónoma de Galicia para o ano 2024.

Así mesmo, este convenio tamén estará suxeito aos artigos básicos da Lei 38/2003, do 17 de novembro, xeral de subvencións, e do Real decreto 887/2006, polo que se aproba o regulamento da devandita lei.

A xurisdición contencioso-administrativa será a competente para dirimir as cuestións que poidan xurdir da aplicación deste convenio.

Ao estaren as dúas partes conformes co estipulado, asinan este convenio.

|                                              |                                                                                                     |
|----------------------------------------------|-----------------------------------------------------------------------------------------------------|
| O conselleiro de Cultura, Lingua e Xuventude | A secretaria autonómica da Federación Española de Religiosos do Ensino de Galicia-Centros Católicos |
|----------------------------------------------|-----------------------------------------------------------------------------------------------------|

José López Campos

Juana Otero Torres